

西山先生眞文忠公文集

五

蘇子卿
知不足齋
PDG

西山先生真文忠公文集卷第六

對越甲藁

奏申

奏乞放宣城縣零苗

臣一介疎庸誤蒙推擇將漕江左深惟連年入
侍軒墀具見 明天子惻怛愛民入境之初首
務布宣德意以圖稱塞今有見之詞牒採之衆
論民以為困者不敢不以具聞臣照得寧國府
宣城縣清流等九鄉水田及官民圩田去歲潦
傷頗甚本司雖差迪功郎太平州司戶參軍趙

汝詹同承奉郎知寧國府宣城縣尤煥於嘉定
七年九月前去徧行檢視統縣計放二分二釐
四毫共米三萬一千二十七石四斗二升二合
緣人戶存饑之後生理未盡復舊遭此水患輸
納必是費力兼目今旱勢未蘇又當起催夏稅
竊慮府縣催督零分苗欠無所從出以致重困
臣今將本縣前項被潦鄉分殘零苗欠權與倚
閣候秋成理納少寬目前外謹錄奏聞伏候

勅旨

申省
狀同

小貼子其以下戶零欠今亦不多推廣上恩

欲使速得蘇息是敢不俟回降而亟行之專輒有罪併乞照會

奏乞爲江寧縣城南廂居民代輸和買狀

四月同安撫司上

臣等猥以非才俱承乏使雖職守不同而責任則一夙宵策勵惟知推廣德意務寬民力庶幾仰答萬分今有近在目前事關休戚而縣邑因循視爲常賦越數十年之久未克釐正者臣等比因旱暵訪求疾苦廼始知之若不亟議蠲除使彫瘵自此少蘇何以上副陛下宵旰勤恤

之意竊見建康府南門之外有草市謂之城南
廂環以村落謂之第一都第二都第三都皆隸
本府江寧縣紹興中行經界府城坊郭與諸門
外不過戶納兩料後錢謂如房地日收賃錢一
文則每年納錢四百省內城南廂以至第三都
成年計六百二十四貫七百二十四文此外他
無一毫稅賦淳熙五年知江寧縣事章騶偶因
推排平白將一廂三都分立和買兩色增料綿
絹於民房地稅賃則起所謂家業錢店肆賣買
則起所謂營運錢有如房地錢日收一十文足

紐家業錢一貫六百二十三文七分每及一貫
文即催和買絹五寸五分綿五分五釐共折錢
一百三十八文七分二釐其店肆賣買比之房
地尤無定準皆是泛行約度紐營運錢每及一
貫文即催和買絹八寸綿八分共折錢一百二
十四文內房地和買裁取絹三百一十三匹六
尺三寸四分綿一千二百五十二兩計錢一千
九百四十一貫五百八十三文所有營運和買
裁取絹一百八十二匹一丈八尺五寸綿七百
二十九兩八錢六分計錢一千一百三十一貫

二百七十一文合兩色而言之共錢三千七十二貫八百五十二文較以疇昔專輸房地役錢已多二千四百二十八貫一百二十八文且均為建康之民坊郭別門相去咫尺悉皆無此獨南門科折特甚於舊度其時雖罹橫斂固不能堪然馬軍行司移屯之始連營列戍軍民憧憧聚彼貿易市廛日以繁盛財力足以倍輸縱使過多尚可強勉粵自師旅之餘饑饉洊至軍旣殫乏民亦流亡居舍賈區蕭疎頽廢而昔年勑增和買定額仍存本縣官吏惟知比舊增數有

加無損以求足辦全不顧念鑿空如此何以繼
之大抵主家以房地起家業錢而賃戶又以店
肆起營運錢一處生業兩項輸送安得而不重
困哉至於因家業營運而科和買綿絹併和買
綿絹以當都團差役輸索重複差徭繁併力不
能支迺徙相望其間未忍輕去者日益窮匱恐
非所以還舊觀壯陪都也臣等若徑乞盡數蠲
減恐賦入素定未易遽除如其知而不問心實
懷愧今公共相度欲從建康府及江東轉運司
各於支用錢內中半抱認取撥自嘉定八年爲

始每歲與之均補錢二千四百二十八貫一百二十八文每歲計錢一千二百一十四貫六十四文却乞將淳熙五年朔增家業及營運錢上所科和買綿絹盡與除豁見在房地一依府城坊郭及東西北三門之外以經界則例起催先來兩料役錢一歲計六百二十四貫七百二十四文從本縣令項催赴建康府交納添湊轉運司并本府抱認錢二千四百二十八貫一百二十八文共成三千七十二貫八百五十二文理充知縣章騫朔增和買綿絹窠名起發上供日

後推排以此爲定即不得巧立名色再敷家業
營運和買綿綃及紐折價錢如此則官雖有償
備之費而和買數存不虧元額斯民積蠹遂可
剷除儻蒙 聖慈特降 睿旨從臣等所乞施
行實一方無窮之幸謹錄奏聞伏候 勅旨定

八年五月二十九日奉 聖旨依

奏乞蠲閣夏稅秋苗

六月
日上

竊見本路州縣今歲以來雨澤闕少臣昨經由
池陽之日其時不雨已及旬餘迨至金陵一向
乾旱蓋自三月至于五月之終九旬之間有雨

者纔六七日焦熬之狀蓋不待言播殖之功一切盡廢臣朝夕訪問惟信與饒得雨頗多歲事可望若建康太平寧國池徽南康廣德諸郡旱勢略同臣以祈禱間出近郊及因閱舟親至采石經行原野莫非赤地四顧所及全無秋苗間有潁江可以車戽之地或已栽插然水熱如湯不堪蔭養茁然長茂旋又焦黃訪聞當塗宣城管下圩埂之鄉每歲常苦水滯今亦種不入土與陸地同近因舟行過大城埭一帶見蝗虫飛泊蘆葦間綿亘十數里未幾遂入府城皆由東

北而來殺天障日遇其所落草木爲空又據諸
處申到若建康府之上元江寧溧水池州之貴
池銅陵寧國府之宣城皆有蝗蝻生發所未申
者尚不及知此一路旱蝗之大略也常平義倉
之儲總一路凡四十三萬而侵移陳腐皆在其
中姑以建康一城言之居民日食凡二千斛而
常平初無顆粒義倉之米以石計者僅一萬九
百有奇以之糶濟城郭之民不數日盡矣况能
更及田野乎以此推之常平義倉已不足恃必
江諸州元非產米之地自經兵旱田疇蕪廢在

在相望所出益少網運起發之外其能幾何接
濟軍民唯仰客販今則兩淮旣皆遏糴河般
運不通上流客舟亦頗不繼諸州米價漸已日
增艱食之虞近在朝夕嘗博訪父老皆言粳稻
雖已失時尚堪雜種麻豆蕎麥黃菜之屬緣田
中無水不通翻犁而不可種下等農民之家賃
耕牛買穀種一切出於舉債今秋成失望小大
憂蹙而官司催督夏稅略不少貸典賣罄竭不
足以償而種子價高無錢可糴而不能種凡曰
陸種僅可救饑近年官司往往不卹每遇檢放

指爲熟田責令輸納苗米未免賤糶所有貴糶
所無以供公上殫其地之出不足以輸所以更
相懲創而不敢種臣自聞此語爲之惻然竊惟
今歲之旱實與往年不同往年之旱多在夏秋
田間旣已布種故雖災傷之甚什至七八而其
熟處猶居二三今則高下之田皆爲荒地借令
雨以時至雜種可投尚恐空於蝗螟之口而况
雨未可期種未可必方來之患日月尚長民情
搖搖已有流移之漸臣近準 朝旨將來合議
糶濟卽與本路諸司同共詳議措置施行臣已

恭稟多方講究外竊謂與其待已饑而行糶濟之惠不若先未饑而加存卹之恩謹具奏請事
件如左

其一曰倚閣夏稅臣近居太平州百姓王經等一百六名狀稱自去冬以來並無雨雪麥苗先已乾死收到些小不了食用目今秧苗又盡枯死蕎麥豆種艱得錢物亦無處收糶田地乾亢至甚亦難耕種老幼日夕憂惶不能存活欲乞備申 朝廷權閣今年夏稅臣方欲冒昧控陳忽準戶部符臣寮奏請內一

項寬旱地之賦以爲秧苗未得種挿人情方
且皇皇而折帛起催半責見鋤版曹既有歲
例州縣苟欲逖責征誅憔悴之民不減星火
之急農困追呼將復失種其爲怨嗟甚於不
雨此當亟行戒約江淞監司目即體訪先來
被旱之處一面行下郡邑將第四第五等下
戶折帛等官物稍寬旬月之期以俟秧種了
畢即蒙 聖旨允從仰見 陛下至慈至仁
勸卹民隱凡有所聞無不施行臣即已鏤榜
曉諭州縣令自榜到日爲始住催一月雖足

以寬目前而一月之後催理如故方細民罄
罄求死不贍之時縱令督促萬端終是無可
償納徒使吏卒並緣得爲苛擾人戶憂迫不
免流移理勢實然非臣過計兼本路近年民
困重賦荒田逃戶所在相望今旣未能招徠
不可使見存之戶更有流徙伏望 聖慈速
降旨揮將本路州縣旱乾不曾種蒔去處第
四第五等人戶夏稅權與倚閣候將來得熟
日併催庶幾稍解倒垂之急臣不勝大願其
二曰蠲放秋苗國家仁愛元元著爲災傷檢